

RCEP dimeterai selepas 8 tahun

Blok dagangan terbesar tingkat keseragaman ekonomi global

Oleh Mohd Zaky Zainuddin
zaky@bh.com.my

Kuala Lumpur: Malaysia bersama 14 negara, termasuk China menempa satu lagi sejarah semalam selepas secara rasminya memeterai Perjanjian Perkongsian Ekonomi Komprehensif Serantau (RCEP), iaitu blok perjanjian perdagangan terbesar dunia.

RCEP yang adalah satu bentuk Perjanjian Perdagangan Bebas (FTA) penting kepada negara terbabit ke arah memacu pertumbuhan perdagangan, terutama ketika krisis COVID-19 sebelum ini dilihat sebagai antara kerjasama ekonomi yang sukar dan mencabar untuk menemui titik nuktahnya.

Apa tidaknya, rentetan rundingan perlu dilalui Kementerian

Perdagangan Antarabangsa dan Industri (MITI) sebagai ketua perunding diterajui Timbalan Ketua Setiausahaanya, Datuk Seri Norazman Ayob bersama 14 lagi negara anggota mengambil masa selama lapan tahun, membabitkan 31 pusingan rundingan, lapan mesyuarat menteri dan empat sidang kemuncak.

Penantian negara untuk mencapai kata sepakat selepas pelbagai cabaran dihadapi akhirnya berbaloi dan lebih manis sesi pemeteraian diadakan bersempena Sidang Kemuncak ASEAN Ke-37 dan sidang lain berkaitan.

Malah, sistem perdagangan global juga mencipta sejarah baharu apabila RCEP menjadi FTA yang dimeterai sepenuhnya secara dalam talian oleh negara anggota yang terbabit, sekali gus menunjukkan digitalisasi adalah platform baharu dalam merealisasikan hubungan pelbagai hala.

Rangka kerja RCEP dilihat menyelesaikan isu tradisional Pertubuhan Perdagangan Dunia (WTO) meliputi dagangan barangan, penyelesaian pertikaian dan perdagangan perkhidmatan,



Pemimpin bersama menteri perdagangan 15 negara anggota pada sesi foto berkumpul selepas majlis pemeteraian RCEP secara maya, semalam. (Foto EPA)

termasuk isu baharu iaitu hak intelek pelaburan, perdagangan digital, kewangan dan telekomunikasi.

Pemeteraian perjanjian itu amat bermakna dan sekali lagi dilihat sebagai peluang terbaik bagi perdagangan global, selepas kegagalan negara maju G20 mencapai kata sepakat dalam cadangan mereformasi WTO pada Jun tahun lalu.

RCEP dianggotai oleh 15 negara merangkumi 10 negara ASEAN, termasuk Malaysia; tiga negara ASEAN+3 iaitu China, Jepun dan Korea Selatan serta dua negara ASEAN+6, iaitu Australia dan New Zealand.

FTA baharu itu pasti mencipta impak lebih besar jika India yang menjadi ekonomi kelima terbesar dunia dengan Keluaran Dalam Negara Kasar (KDNK) nominal AS\$2.94 trilion (RM12.1 trilion) tidak menarik diri daripada rundingan pada November tahun lalu.

Walaupun tanpa India, RCEP kekal menjadi antara FTA terbesar dunia merangkumi 2.2 bilion atau hampir sepertiga (29.7 peratus) penduduk dunia dan menyumbang sebanyak AS\$24.8 bilion (RM102.187 bilion) atau 28.9 peratus KDNK dunia.

Umum mengetahui mengenai RCEP, namun tidak ramai memahami apakah manfaat dan kepentingan perjanjian ini untuk komuniti perniagaan serta penduduk negara anggota.

Secara dasarnya, matlamat RCEP adalah untuk menggabungkan keenam-enam FTA ASEAN menjadi satu FTA tunggal yang dapat menyumbang kepada pengukuhan aktiviti rangkaian nilai wilayah di rantau ini, di samping menjadikannya lebih mesra pengguna dan lebih mudah digunakan, terutama kepada perusahaan kecil dan sederhana (PKS).

Perjanjian itu juga bertujuan

mencapai taraf perjanjian perkongsian ekonomi yang moden, lengkap, berkualiti tinggi dan saling menguntungkan antara negara anggota seperti yang sudah dipersetujui dalam Panduan dan Objektif Rundingan RCEP.

Antara skop RCEP termasuk penghapusan tarif; liberalisasi sektor perkhidmatan; promosi, fasilitasi, perlindungan dan liberalisasi pelaburan serta kerjasama ekonomi dan teknikal.

Bagi syarikat Malaysia, pastinya pelbagai manfaat diperoleh menerusi RCEP, termasuk akses pasaran kepada hampir separuh penduduk dunia yang mana sumber bahan mentah dapat diperolehi dari kawasan serantau dengan harga yang berdaya saing.

Tan Sri Muhyiddin Yassin berkata, RCEP yang berjaya dimuktamadkan semalam bakal menjadi penggerak utama dalam menyepadukan ekonomi serantau.

Perdana Menteri menjelaskan, perjanjian yang dimeterai 15 negara anggota itu dapat mempertingkatkan keseragaman ekonomi ASEAN dan Rakan Dialog, walaupun tahap perkembangan ekonomi yang berbeza.

Muhyiddin percaya RCEP menjadi pusat untuk pertumbuhan dan semangat kerjasama ekonomi serantau yang komprehensif untuk masa depan.

Katanya, Malaysia bersama-sama dengan ASEAN dan rakan FTA ingin membuktikan kepada dunia, walaupun tahap ekonomi berbeza dalam kalangan 15 negara dapat bersatu dan memuktamadkan perjanjian perdagangan.

“Perkongsian yang akan menguntungkan semua bukan hanya untuk komuniti perniagaan, tetapi juga dapat meningkatkan kehidupan rakyatnya yang merangkumi hampir satu pertiga penduduk dunia,” katanya berucap pada Sidang Kemuncak RCEP

Ke-4 secara maya, semalam.

Sementara itu, Menteri Kanan yang juga Menteri MITI, Datuk Seri Mohamed Azmin Ali, berkata RCEP menjadi bukti dalam pengukuhan sistem perdagangan pelbagai hala dalam usaha untuk memperkasakan agenda pembangunan di bawah Pertubuhan Perdagangan Dunia (WTO).

Perjanjian itu, katanya, bakal mempertingkat, memudah cara dan melindungi persekitaran pelaburan negara anggota di rantau ini, selain menyumbang ke arah kelestarian Malaysia sebagai hab perdagangan serta destinasi pelaburan pilihan.

“Ia adalah penanda aras yang penting dalam penyatuan dan memacu pertumbuhan ekonomi antara 15 anggota perjanjian ini,” katanya.

Azmin turut menjelaskan, RCEP bakal menjadi pemangkin kepada pemulihan ekonomi akibat COVID-19 yang mana perjanjian itu akan membantu memastikan pembukaan pasaran serta rangkaian bekalan yang tidak terganggu.

Beliau berkata, RCEP menggabung dan menyeragamkan FTA ASEAN+1 yang sedia ada, iaitu membabitkan Jepun, Korea Selatan, China, Australia serta New Zealand ke dalam satu perjanjian yang inklusif dan komprehensif.

Selain itu, katanya, perjanjian itu bakal meningkatkan lagi perdagangan serta pelaburan antara negara peserta dan serantau, disamping memperkukuhkan rangkaian nilai serantau dan memudahkan ketelusan, perkongsian maklumat serta penyelarasan peraturan dan standard teknikal.

Bagi peserta pasaran, RCEP dilihat bakal memberi kesan besar kepada syarikat tempatan dari aspek akses pasaran, rangkaian nilai baharu, aktiviti ekonomi serta rangkaian berkaitan bekalan serantau.